

Qanoq qimmit qimuttut ikiliartuinnarnerat mumisinneqarsinnaanersoq qanorlu qimussertarnerup nukittorsarneqarsinnaanera pillugu apeqquteqaat aallaavigalugu oqallisissiatut siunnersuut.

(Inatsisartunut ilaasortaq, Villy Olsvig, Inuit Ataqtigiit)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Siullermeerneqarnera

Naalakkersuisut qujassutigaa Inatsisartunut ilaasortap Villy Olsvigip, Inuit Ataqtigiinneersup, oqallisissiatut siunnersuutaa.

Ajoraluartumik ilumoorpoq qimmit qimuttut Qeqqata Kommuniani taamaallaat pinnani, kisiannili aamma nunatta sinnerani ikiliartormata. Naalakkersuisut ilisimalluarpaat killormoortumik ineriartorneq, taamaattumillu Naalakkersuisut nuannaarutigaa siunnersuuteqartup suliassaq Inatsisartunut saqqummiummagu.

Qimmit qimuttut pillugit ataatsimeersuarneq Arctic Nomads 2016-imi Nebula-mit aaqjissuussaq, Sisimiuni ingerlanneqarmat Naalakkersuisut sinnerlugit peqataaffigaara. Ataatsimeersuarnerup ilaatigut siunertaraa killormoortumik ineriartornerup tamatuma oqallisigineqarnissaa aaqjissutissarsiornissarlu. Nunat ataatsimeersuarnermi peqataatitaqartut sisamaapput, unammilligassamik tamatuminnga tamarmik peqartut. Misilittakkallu amerlasuut saqqummiussorneqarput pitsaasunillu aaqjissutissanik siunnersuuteqartoqartarluni.

Peqataasut ilagaat, kulturimik piujuaannartitsineq pillugu saqqummiisoq. Erseqqissarpaa qimminik qimuttoqarnermik kultureqarneq attatiinnarneqarsinnaanngitsoq periaasitoqqat atonerisigut, kisiannili paarlattuanik, ineriartortitsinikkut.

Naalakkersuisut pilersaarutigaa, Arctic Nomadsimi nalunaarusiaq tunngavigalugu, iliussissanik pilersaarusiornissaq innersuussuteqarnissarlu, ilaatigut Kalaallit Nunaanni Qimussertartut Kattuffiat (KNQK) kommunillu qimuttoqarfiusut suleqatigalugit.

Naalakkersuisut aamma kissaatigaa qanimut suleqateqarnissaa kattuffinnik qimminik qimuttoqarnerup kulturitut ingerlanneqarneranik suliaqartunik. Tamatumunngalu atatillugu KNQK ataatsimeeqatigisimavakka ajornartorsiutit eqqartukkagut pillugit. KNQK-ip Naalakkersuisullu isumaqatigiissutigaa meerartagut pingaaruteqartumik inissisimasuusut kulturimik tamatuminnga piujuaannartitsiniarnitsinni, taamaattumillu Naalakkersuisut 2017-imi aningaasaliissuteqarput ilassutitut, meeqqat Avannaata Qimussersuani peqataasinnaaqqullugit. Naalakkersuisut KNQK-mi siulersuisunit ilisimatinneqarput aamma

namminneq ineriartornerup killormut ingerlanera ilisimaarigitsik, KNQK-lu ajornartorsiummut sammisunik suliniutinik pilersaarusiortoq.

Naalackersuisut ilisimatitsissutigissavaattaaq, qimmit qimuttut immikkut pillugit maanna inatsisissaliortoqarmat, kalaallit qimmianut illersuisussaq.

Taamatullu oqaaseqarlunga siunnersuuteqartoq qutsavigaara sammisassamik taamak pingaartigisumik Inatsisartunut saqqummiinera pillugu.